



হকেং হকেং

আলোময় চাঙমা



কল্পতরু বই পিডিএফ প্রকল্প

কল্পতরু মূলত একটি বৌদ্ধধর্মীয় প্রকাশনা প্রতিষ্ঠান। ২০১৩ সালে “হৃদয়ের দরজা খুলে দিন” বইটি প্রকাশের মধ্য দিয়ে এর যাত্রা শুরু।

কল্পতরু ইতিমধ্যে অনেক মূল্যবান ধর্মীয় বই প্রকাশ করেছে।

ভবিষ্যতেও এ ধারা অব্যাহত থাকবে। কল্পতরু প্রতিষ্ঠার বছর খানেক পর “kalpataruboi.org” নামে একটি অবাণিজ্যিক ডাউনলোডিং

ওয়েবসাইট চালু করে। এতে মূল ত্রিপিটকসহ অনেক মূল্যবান

বৌদ্ধধর্মীয় বই pdf আকারে দেওয়া হয়েছে। সামনের দিনগুলোতে

ক্রমান্বয়ে আরো অনেক ধর্মীয় বই pdf আকারে উক্ত ওয়েবসাইটে

দেওয়া হবে। যেকেউ এখান থেকে একদম বিনামূল্যে অনেক মূল্যবান

ধর্মীয় বই সহজেই ডাউনলোড করতে পারেন। আমাদের একমাত্র

উদ্দেশ্য হচ্ছে, বর্তমান আধুনিক প্রযুক্তির যুগে লাখো মানুষের হাতের

কাছে নানা ধরনের ধর্মীয় বই পৌঁছে দেওয়া এবং ধর্মজ্ঞান অর্জনে যতটা

সম্ভব সহায়তা করা। এতে যদি বইপ্রেমী মানুষের কিছুটা হলেও সহায়

ও উপকার হয় তবেই আমাদের সমস্ত শ্রম ও অর্থব্যয় সার্থক হবে।

আসুন ধর্মীয় বই পড়ুন, ধর্মজ্ঞান অর্জন করুন!

জ্ঞানের আলোয় জীবনকে আলোকিত করুন!

This book is scanned by Dayamitra Bhante

হক্কেং হক্কেং

একক ছড়া গ্রন্থ

আলোময় চাকমা

মোবাইল : ০১৭৬৪৩৫৬৮৮১

ইমেইল : alomoyc6@gmail.com

স্বত্ব

লেখক

প্রথম প্রকাশ

ফেব্রুয়ারি ২০১৭

প্রচ্ছদ

শুপংকর চাকমা

বিশেষ কৃতজ্ঞতা

বি. জ্যোতি ভাস্কর

মুদ্রণ ও বাঁধাই

একজিকিউট প্রিন্টার্স

প্রকাশক

পরিবার পাবলিকেশন্স

মরিয়ম ভিলা (৩য় তলা)

৮৭ নয়্যাপল্টন, মসজিদ গলি, ঢাকা-১০০০

ফোন: +৮৮০ ১৭১৫৮৪১০১০

মূল্য

১৪০.০০ টাকা (একশত চল্লিশ টাকা মাত্র)

০৫.০০ ইউ এস ডলার

১৮০.০০ ভারতীয় রুপি

Hokkeng Hokkeng

by Alomoy Chakma

Published by

Paribar Publications

Price Tk. 140.00 | US \$ 5.00 | INR 180.00

ISBN: 987-984-92749-2-6

উৎসর্গ

জীবন চলার পথে সুখ-দুঃখের সঙ্গী রাসু চাকমা
দু কন্যা যাত্রী ও টিকা চাকমা
যাদেরকে স্বপ্ন ছাড়া কিছুই দিতে পারিনি।

ভূমিকা

রবীন্দ্রনাথ তাঁর ডাকঘর নাটকে পাঁচমুড়ো পাহাড় আর শ্যামলী নদীর ছবি এঁকেছিলেন। সেখান থেকে মন ভরানো দই এর হাঁড়ি নিয়ে অমলের দইওয়ালা আসতো।

ছড়াওয়ালা আসতো কি ?

“হক্কেং হক্কেং” যেন পার্বত্য এলাকার সরল শিশুদের জন্য নিয়ে এসেছে এক অপার্থিব মন ভরানোর রসদ- হরেক ছড়া। সে ছড়া আপাত অর্থহীন, কিন্তু অমল আনন্দের রসমধুর। তা দিয়ে হয়তো বিপ্লব ত্বরান্বিত হবে না, সমাজ সংস্কারে প্রত্যক্ষ মদত আসবে না, কিন্তু তৈরি হবে কিছু মধুর স্বভাব মানুষ যাদের শৈশব ছিল প্রকৃতি আর পাহাড়ের দানে নিটোল সুন্দর।

আমাদের ঘরে ঘরে যে সোনার পুতুলগুলি আদরে যত্নে বেড়ে উঠছে তারা আলোময় চাকমার এই ছড়াগুলিকে ভবিষ্যতেও ভুলবে না। এর ছন্দের দোলা তাদের রক্তে মিশে যাবে, এর স্নেহরস বয়ে যাবে এক প্রজন্ম থেকে আরেক প্রজন্মে। তারা ভালোবাসতে থাকবে নিজের অতুলনীয় দেশ আর তার বিশাল মনের মানুষদের।

রবীন্দ্রনাথ শিশুমনের ওপর ছড়ার এই বিশেষ প্রভাব হৃদয়ঙ্গম করেছিলেন বলে নিজ উদ্যোগে বহু হারিয়ে যেতে বসা ছড়া সংগ্রহ করেছিলেন বাংলার গ্রাম থেকে। আলোময় চাকমা সেই ধারার অনুসারী। আধুনিক হ্যামিল্টনের বাঁশিওয়ালা, যিনি শিশুদের নিয়ে যাবেন না, ফিরিয়ে দেবেন কোল জুড়ে, আর জাগ্রত করে দেবেন পরিপূর্ণ মানুষ হবার বীজমন্ত্রটি।

চাকমা শিশুরা ভাগ্যবান, তাদের এইরকম একজন ছড়াকার আছেন!

বইটির বহুল প্রচার কামনা করি।

অধ্যাপিকা

প্রতিভা সরকার।

কলকাতা, পশ্চিম বঙ্গ।

আলোময় চাকমার প্রকাশিত গ্রন্থ

১. ফুলবারেঙ (সম্পূর্ণ চাকমা বর্ণমালায়)

অপ্রকাশিত ছড়া, কবিতা প্রায় ২০০টি।

তজিম পাদা

(০১) জুম হাবা.....	১১
(০২) বেঙ্ ডগন্ত্ ক্র' ক্র'	১১
(০৩) ঠুত্যা বুইয়ার	১২
(০৪) দ্বি দাজ্যা রা	১২
(০৫) সনার চিজি নাগুরী.....	১৪
(০৬) সনার চিজি	১৪
(০৭) জুম রাগা	১৫
(০৮) নাগুরী.....	১৬
(০৯) হাঙারা ধরা	১৬
(১০) বাদল' গুলি.....	১৭
(১১) পিচ্ছুঙ্ পিচ্ছুঙ্.....	১৭
(১২) ভাসুয়া মনা	১৮
(১৩) পিদে	১৮
(১৪) জুন পহর.....	১৯
(১৫) চুগলুঙ্ আঝি	১৯
(১৬) মুক্যাথুর.....	১৯
(১৭) হাম্মো নাগুরী	২০
(১৮) চিগোন্ ছড়া ইজা-মাজ্.....	২০
(১৯) পোবাং বিজি.....	২২
(২০) শাম্মি পিদে.....	২২
(২১) সনার্ গরবা.....	২৩
(২২) তেঞেঁবাঙ্.....	২৩
(২৩) কুরবো	২৪
(২৪) সনার আঝি.....	২৫
(২৫) বো হবা.....	২৫
(২৬) মুক্যা গাজত্ চগদা.....	২৬
(২৭) সুঘোর জীংকানি	২৬
(২৮) বেলেইয়ের ঘুম	২৭
(২৯) চ'গদা	২৭

(৩০) মিলনি পাদার ন'	২৮
(৩১) তদেক.....	২৯
(৩২) টুত্রিং টাট্রিং.....	২৯
(৩৩) ধুধুহাঙ	৩০
(৩৪) তিদাশাঁক	৩০
(৩৫) হক্কেং.....	৩১
(৩৬) বলাঞাঁ	৩১
(৩৭) কাজারাঁ ধরা	৩২
(৩৮) বো চা.....	৩২
(৪৯) চড়ই বাহু.....	৩৩
(৪০) ঘ'হজ্যা.....	৩৩
(৪১) বাজে ঘর	৩৪
(৪২) জাল্ বাহু.....	৩৫
(৪৩) তিমপুর	৩৬
(৪৪) টঙঁ ঘর.....	৩৭
(৪৫) মল্যে ঘর	৩৮
(৪৬) নাদেং.....	৩৮
(৪৭) মর লাঙেনী	৩৯
(৪৮) জুম.....	৪০
(৪৯) আলপালুনি বন্ধ	৪১
(৫০) তেনতেঙুরি	৪২
(৫১) পেত্যা ফিড়িং.....	৪২
(৫২) সনার চিজির বুগোপাদা	৪৩
(৫৩) বোলী পিনোন.....	৪৩
(৫৪) মাজ' জু.....	৪৪
(৫৫) মাধা রার্ভা জুম্মোধান	৪৫
(৫৬) পদারার চাংমা লেঘা	৪৬
(৫৭) আঝি.....	৪৬
(৫৮) বিনি ধানান মুজিয়ার	৪৭
(৫৯) বান্দরে শুগাদন ধান.....	৪৭
(৬০) চিজি ইক্কে মামু ঘরত.....	৪৮
(৬১) ওলি	৪৯
(৬২) বোলী.....	৫০

(৬৩) মারেহ্ পিধে.....	৫১
(৬৪) ছাবিনেহ্	৫১
(৬৫) মিজেল' দুলো হার্বারী.....	৫২
(৬৬) সনার চিজি গাজ্ বান্দর.....	৫২
(৬৭) জারহাল্যা - (১).....	৫৩
(৬৮) জারহাল - (২),.....	৫৩
(৬৯) চিজি আধত্ পিধে.....	৫৪
(৭০) হত্ গোরাম্.....	৫৫
(৭১) ছড়া ঈঝে.....	৫৬
(৭২) রা বাঞোঁ রি.....	৫৭
(৭৩) জুরপল্লা.....	৫৮
(৭৪) ম' বল্ এক্কা.....	৫৯
(৭৫) সনার চিজি হেব'.....	৫৯
(৭৬) ফুজিঁ	৬০
(৭৭) উন্দুরোহান্ উল্.....	৬০
(৭৮) জেদেনা হৈ.....	৬১
(৭৯) আঝার মাজ	৬১
(৮০) চেজেক্ বুবুক্.....	৬২
(৮১) ডিজিটাল বৈদ্যালি	৬৩
(৮২) চিজি ইক্কুলোত্ যেব'.....	৬৪
(৮৩) বেবে বেনান্ উদোনত্.....	৬৪
(৮৪) হন্যাঁ হাম্মো?	৬৫
(৮৫) সনার চিজি ইক্কুলোত্ যার.....	৬৫
(৮৬) আমা চিজি ওমা ওক্	৬৬
(৮৭) বান্দর' ধান্ তলোই	৬৬
(৮৮) যে চাঙমা সে চাঙমা.....	৬৭
(৮৯) আন্ধার ঘরত্ অবং পহর	৬৭
(৯০) ফুয়াই ই ই...বাল্যা.....	৬৮
(৯১) ওলি (ঘুমপাড়ানি)	৬৯
(৯২) চিত্ পাগল্ ডাঙর ভুজি.....	৭১
(৯৩) আমা ভুজি ধহল্ করা	৭১
(৯৪) বান্দরে ঝাড়দন্ ঘুচ্যে তায়্যা.....	৭২

জুম হাবা

ভাত্বন্ অলাক্ হগরা,
খে লগই য' থরা থরা,
ন' থাক্‌য়া আর মরা মরা।

পথান্ অইয়ে দুরোদুরি,
সিত্বন্ আর' মুড়োমুড়ি,
যা তাগল্ ল' তে মনত্ গুরি।

মা পিখীমিরে স্বাক্ষীয়ে,
এক্ কুপ্, দ্বিকুপ্ দিলুঙ—
ধানে-সুধোয় ঘর ভোরে দোক্ লক্ষীয়ে।

নানান সুধোমে চান্‌য়া চেই,
ডালি বাহজায় এগেম হেই,
বর মাগি পিখী পিখী সুগে থেই।।

বেঙ্ ডগত্তন্ ক্র' ক্র'

বেঙ্ ডগত্তন্ ক্র' ক্র',
চিজি অইয়ে ডর' মর'।

এক্ আহধে দুলো,
এক্ আহধে লুরো।

বেঙ্ আনিলো দুলো ভুরি,
ঘরত্ নেইদে কানা হুড়ি,
নুন্ মুরিচ্ হিচ্ছু নেই।
ইদুচ্ছন্ বেঙ্ হিঙোরী হেই!

ঠুত্যা বুইয়ার

হোলোই হোলোই আমিলা আগা,
মামা দের হাঙারা তাবা।
পিবির পিবির দোগিনো আহভা,
জুরো পুরি গেল্ ভুইয়ত্ ছাহবা।

ঠুত্যা বুইয়ার ওলোজোল,
চিজির চোগোত্ ফেজা পোল্।
শারাল্যাচিল্য শো মারি,
চোংকুয়া দিল' পহর্ গুরি।।।

দ্বি দাজ্যা রা

তিবিরাঙ্ গুইবো শর-শরার।
হুচ্যা হুরাবো কহর-হরার।
রাঙা বে পরানান্ ধহর-পরার।
পেঙ্কুয়া পুনে লহর-হরার।

লুহ্যাঙ্ বেলেইবুয়া ঘর-ঘরার।
বুড়া হুরাবো অধক্ তক্-তগার।
ভরন্দি আদামত্ পুজ্জে জয়-জয়ার।
জুম্মোউনে দিয়োই এজ' সংজয়ার।

গুলিত্ হুগদাবুয়া তিক্-তিগার।
রোদে চোংকুন মির-মিরার।
য়িনে দাতুয়া শির-শিরার।
তাগলগতুন্ পানি ঝড়-ঝড়ার।

ভাতুয়া মনাবুয়া হের-হেরার।
হুতুরি বুচ্যা পের-পেরার।
হুতাল্ মিলাবুয়া ভেন্-ভেনার।
দরে পাদুরি গির-গিরার।

অজাত্যা মজাবো হেন্-হেনার।
ভীর অইয়ে ফারদ দুরি চিন্-চিনার।
দিবুচ্যা ঘুচ্যা তাগা ঝন্-ঝনার।
জুলি উতে আশুনান্ ভন্-ভনার।

গাবুর পাক্কে রাঙাঁ দা হন্-হনার।
ননেইয়া নুদিবানী তেন্-তেনার।
ন' ধুরিচ্ চিগোন্ দা ছুর-ছুরার।
ছাজিত্ চিজিক্কো চেক্-চেগার।

হাজরত্ এরিয়া পুক্ জিক্-জিগার।
নিগিলের পজাবাচ্ গল্-গলার।
শন্ মজ্যে ঠেঙান্ ঝেন্-ঝেনার।
ভ' অইয়ে পাগালা ভদ্-ভদার।

পানি তিরাজে ধুরি ছদ্-ছদার।
আহধ্ ছাবরে যাঁজা পদ্-পদার।
ঝালে লেত্য ধের-ধেরার।
ভুজোলে পিখীমি ধিগ্-ধিগার।

মুজ্জো যেই বুচ্যা তাক্-তানের।
তেলে মাল্যা ধক্-ধগার।
গড়া ফিয়োঙত্ ভাক্-ভাগার।
মালা উগুননোয় বির-বিরার।

চিনদিরা জুক্কো লিক্-লিগার।
আলচ্যা গপ্পো ফাক্-ফাগার।
শোল্য হুত্তরিবানি তাক্ তাগার।
চোরাইয়া পিঙান্ আর' চুল্-চুলার।
হর' খেই জিলান্ টিঠ্-টিরার।।।

সনার চিজি নাগুরী

সনার চিজি নাগুরী,
চেই আগে তেহ্ আ'গুরি।
তা মা এব' জুমোতুন,
আনি দিব' ছুধো ফিরিঙ,
চোখুন তার গুরিঙ গুরিঙ,
হারি লব' তেহ্ হুচোতুন।
হাঙারা দাঁড় অমা অমা (বড় বড়),
পুড়িলে বাচ্ চ'না চ'না,
হামেরেই দাঁড় হুকুরুক।
চিগোন্ চিজি গাই খেব',
ন' মাক্কুয়া হাররে ন' দিব',
সবাই ন' গুজ্জো জাগুলুক।।।

সনার চিজি

সনার চিজি আঝিলে,
দ্বি আহধ্ তুলি নাজিলে,
হুতুরি বুজ্যার রাক্ জুরায়।
নাক্ বাজি আর চোখ্ বাজি,
বগড়া দাঙোই দোল্ আঝি,
দেগিলে পরান্ ধরফরায়।
রাঙা চিক্ চিক্ দ্বিয়ান্ গাল্।
বাবা চুয়ার ভুইয়ত্ য়াল্।
আয় আয় ডাগের বাবারে।
মামা দের বেগুনো তাবা,
উলোন্ ছালত্ দগিনো আহভা।
তুচ্যা ন' লাগিয়ো হিয়য় মামারে।
সনার চিজি ভাত্ রানে,
মুগুজো গাজ' ফুল্ আনে,
মালা ভাঙালোই।
সনার চিজি লোবীয়ত্ গরে,
চিক্কুয়া ডাগের তরে মরে,
এজ' বেঙ্কুনে খারা অই।।

জুম রাগা

হমরত্ বানি গুলি হাজা,
গারেঙ্ ঘরত্ পার্বীয়া চাজা।
লুকদি আগে চিগোন্ দাদা।
এ হল্ ও হল্ গেলঙ্ ধান্,
ইন্দি গেলে উন্দি হান্।
পাক্কে জুমান্ গোদা।

গাজে গাজে তদেক্ ঝাক্,
চুপ্ চুপ্ চপগুরি থাক্।
আন্দলে আন্দলে রিনি চ'।
গুলিত্ ইচ্চা ছাজ্ পোরেম্,
চের আড়ি ধানর তঙ্ ভোরেম্।
বাজিবার মুন্জুক্কো থেলে ফিরি য'।

বান্দরে হাদন্ পাগানা ধান্,
বাদল হিজি জুরে টান্।
ওলাবো চেই মার।
ইক্কুয়া চোখ্ হাদি তাক্।
পুয়ো পুয়ো বুগোত্ লাক্।
ইক্কুয়া গুলিত্ পর।।।

নাগুরী

চিগোন্ চিজি বেন্ বুনে,
আলক্ তুলি ব'হাদি।
সনার চিজি হুন্ হনার,
বেঙ্কুনে শুন' হান্ পাদি।
মক্যা গাজর ছেঙ্ক বাশ',
জেদেনা গাজ' বিয়োঙ,
বিয়োঙ আবারায় গুরুঙ্ গুরুঙ্,
গুজুরি উদে হয়োঙ।
ফুল্ তুলে তেহ্ চোখ্ হাদি,
বেক্ ফুলুন্ তার মনত্ আগে।
বিঞ্যাঁ বাজে বিল্যা হাবে,
মাসমূলা তার ন' লাগে।।।

হাঙারা ধরা

লুরো লবে নেনা বোম্বা লবে,
আক্কল্ অবে নেনা পিচ্ছের অবে?
নাহি আর' ডরেম হবে!
ভাক্ গুরি যেবঙ্ দ্বিজন্ দ্বিজন্,
ধুরিবঙ্ হাঙারা যে যার অজন্।
পুজোর গুরি চ' আগি ক'জন্।
ধোঙওয়া লগে ধনবী যেব',
জুম্ববী ম' লগে খেব'।
সাজ্ গুড়ি গেলে লত্ দিবঙ্।
দুলো পুরেলে ফিরিবা,
তেগ' দজরত্ বাচ্ছেবা।
এক্কুই সমারে ফিরিবং।
ইজা-মাছ্ ফেলে ধুরি লোই,
হোজুলী গুরি ভুজিরে হোই,
রানি হেবংগোই সমারে।
গব্ মারিবংগোই জুন্ পহরত্,
ধাগাধাক্যা বোই ইজোরত্,
এজ' এজ' বলাঞ্যাঁ দিলুঙ্ বেগরে।।।

বাদল' গুলি

হোচ্যা দাদা বান্দর মারের,
হুগি বাদল্ কাক্ গুরি।
বাদল' গুলিত্ অরিঙ্ রইয়ে,
এজ' বেঙ্কুনে ভাক্ গুরি।

জেদেনা গাজত্ তদেক্ ঝাক্,
বান্দরে হাদন্ ধান্।
হোচ্যা বেবে তাক্ বাজে বাজে,
গা ধোজ্যোগোই গান্।।।

পিচ্ছুঙ্ পিচ্ছুঙ্

পিচ্ছুঙ্ পিচ্ছুঙ্ লাই লাই লাই,
দাড়ি মোরে দ্যুঙ্ ঘরত্ আয়।
মামা রানের বিনি ভাত্।
উন্দুর ন' দেগিলে চোংকুন্ হাত্।
বিনি ভাত্ হেলে দেগিবে,
আর' বিনি ভাত মাগিবে।

ভাতুয়া মনা

ভাতুয়া মনাবো হের হেরার,
হুতুরি বুজ্যা পের পেরার।
সনার চিজি ঘুম্ ন' যার।
ধুলাদে ধুলাদে আহ্ ধু লার।

হেরেঙজু দুলোনত্ হেরেদ' চাক্,
দুলন্ বুনি' চলাআপ্।
লক্ষী চিজিক্ চুন্ধি থাক্,

সনার চিজিক্ ঘুম্ য়েব'।
তা মা এলে তেহ্ জাগিব'।
তা মা আনিব' পিত্তুঙুলো,
বেক্কুন্ তেহ্ গাই হেব'।।।

পিদে

হলা পিদে হলা দলা,
গরের চিজি ফেলা-ছেলা।
বিনি পিদে আহদা বেশ্,
হগা পিদের লাম্বা লেশ্।

শাম্মি পিদে গুল্ গুল্,
বড়া পিদে চাগা।
ডুগি মত্তন্ ফেলা-ছেলা,
ফুরেলে পিদে তোগা।

জুন্ পহর

কাহদি মাস্যা জুন্ পহরান্—

কারি নেজেল' পরানান্।

দ্বি আহধ তুলি চিজি ডাগে,

তা মাত্তুন্ তেহ্ জুনান্ মাগে।

আয় আয় চানান্ ইধু আয়।

আমি মামালোই গায় গায়।

চুগলুঙ্ আঝি

সনার চিজির চুগলুঙ্ আঝি

চেলে এজ' যাদি-মাদি।

ঠেষ্ঠা দিনেই ন' পেবা।

সময় গেলে ন' ধেহবা।

সোনা-রুবো ভরে ভর,

ন' মিলে আঁঝি জনম্ ভর।

মুক্যাথুর

হজি হজি মুক্যাথুর,

চঙরানি চেলে ভালোদুর।

চিজি মুক্যায়ুন্ রাগেব',

চগ'দা এলে ঝোগেব'।

বিনি মুক্যায়ুন্ গাই হেব'।

রাজার পুয়ায় বো চা এব'।

রাজার ঘরত্ বো দিবঙ্।

ভেঙপাদি ঝাক্ নাজেবঙ্।

বাজি পোদেবং জয়ারে,

ছিদি নেজেব' বুয়ারে।

হাম্মো নাগুরী

সনার্ চিজি নাগুরী,
বেন্-সুধো হাম্ ত' গুরি।
আহদা ধল্য জুম্ মূখ্যা,
পিদিত্ ইক্কুয়া টঙ্ বুক্যা।

হাবিবার্ হিয়র্ হবর্ নেই,
মুজিয়ার্ ধানান্ পাগিনেই।
চেই থেলে হাররে ন' অব',
নাগুরী হামত্ আক্কোব'।

মাম্মা-চিন্দ্রা জুম্ জগা,
মামা যিয়েগোই তোন্ তোগা।
নাগুরী হাবিবোগোই কব'রক্ ধান্,
সেনতায় পিঞেগোই নুয়ো পিনোনান্।

চিগোন্ ছড়া ইজা-মাজ্

ওমা ওমা হাঙাঁড়া দাড়্,
ইত্তুক্ ইত্তুক্ শাজ্।
চিগোন্ ছড়ান্ গধা দিলে,
বানা ইজা-মাজ্।

নামালাঙ্ মাজ' ঝাঁক, আ—
মোঁই হাঙাঁড়া ছ'।
দাজ্যা ইজা বালোচ্ হাঙাঁড়া,
হন্যা লব' হ'।

মোন্ হাঙাঁড়া জেদ্ হাঙাঁড়া,
দাড়ানী চেলৈ ওমা ওমা,
চাক্ হেবা নেনা ঘিলুক্ হেবা,
পুড়িলৈ বাচ্ চ'না চ'না ।

পাদাত্ তলে শুদুঙ্ মাজ্,
ধন্তে ধন্তে ছনদি যাস্।
গাদত্ চেলে ভরন্ ভরন্,
বানা উগোল্ মাজ্।

মানেক্ বেগেনা লুই ভরন্,
বেক্কন্ পেদে ল'।
চোগোত্ ন' পুচ্যা পাত্তোরী ইজা,
লোই ন' পাল্লে থ'।

চুমো হেবাঙ্ দি শুদুঙ্ মাজ্,
মোন্ হাঙাঁড়া চাক্ বাদি।
দাজ্যা ইজা মোঁই হাঙাঁড়া,
গোরিবঙ্ হল্, নুন্-অলোদ্ দি।

মানেক্ বেগেনার্ পাদা হেবাঙ্,
উগোল্ মাজর্ শিক্যা।
দেগিলে মুয়োত্ লেত্য এজে,
অইয়ে পরানান্ লিলিক্যা।

রিঝুম্ বাজত্ আবুজি,
মেজাঙত্ তুলি পাদা পোই,
লেত্যা হা, লেতিয় হা, বানা দ্বি জনে,
লোবিয়ত্ গোরিবংগোই।

হবরক্ ধানর্ আদাহ্ ভাত্,
হলাগাজর্ পাদা পোই।
লক্কি চিজিক্, সনার্ চিজিক্,
জুম্মবী সমত্ হেবঙগোই।।।

পোবাং বিজি

ভঘদাঙ্ ভঘদাঙ্ পোবাং বিজি।

উঝি খেব' সনার্ চিজি।

উঝ্যাত্তুন্ আর' পুজ্যা চরপ্।

পিনোন্ খাদিয়ে লাগেৰ্ ভরপ্।

নিবিলি নিবিলি গাজ' ঝুপ্।

ছেড়ে ছেড়ে পোবাং থুপ্।

ছগদা বান্দরে ঝুপ্ ঝুবান্।

পল্লে পোবাং বিজি লুককুদান্।।।

শাম্মি পিদে

পেহত্য পাদালোই হগা পিদে,

শাম্মি পিদেত্ দলা মিদে।

শাম্মি পিদে কে' সিজ়ে,

ঘুচ্যা হলা দিই মিজ়ে।

ডাঙর্ দাধা আদু কুবি,

পিদে মুলিল' চিবি চিবি।

ঘে' পিলাবুয়া বিজিদি গেল্,

পোগোন্ পিলাবুয়া ভাঙী গেল্।

ভুজি আধত্ গরম্ পানি,

মামা দেল্লোই দারু বানি।

বেঙ্কুন্ অলাক্ ওলোঝোল্,

সনার্ চিজি আহমক্ ওল্।।।

সনার্ গরবা

মোনো ওবোলা মামু ঘর।

চিজি এল' বজর্ পর।

সনার্ গরবা লুক্কি চিজি,

কধা ন' কুইয়' হাবি জাবি।

মামু ধুরিলো কুচ্যা রাদাঁ,

পোইয়ত্ ন' তুল্লো লাদা পাদা।

কেকরেহকেক্ বারা বাহনি,

পিদে দুগি দিল' মামী।

দুলু চুমোত্ মোজো দই,

তেলে নিল্ মরে পাদা পোই।

মামুভুন্ মামীরে লুক্কি পাং।

লেন্জর্ ছাড়ি লারহারাঙ।।।

তেঞেঁঝাঙ্

দনাহ্ হুয়োঙ' ধুরী বেই,

পিবির্ পিবির্ বুইয়ার এই।

হেরেঙজু দুলোনত্ সনার্চিজি।

বুইয়ারান্ এজের আজিপুঝি।

দুখ্যা মা-বাপ্ ঘরত্ নেই।

চেরআড়ি জুম্ কাবিনেই,

আধতান্ ধোই পাদতান্ ফেলে,

জীংকানি ন' চলের গমেদালে।

পার্বুয়াবেদর কেরেদ' চাক্,

দুলোন্ বুনিল' চলাআপ।

করক্ করক্ রুয়োবাজ্।

তেঞেঁঝাঙ্ গল্পে কেজান্ পাছ্???

কুরবো

১.

দিবুচ্যা মাধান্ ঘুমোত্ত্বন্ উধি,
পাদল্ পাদল্ উলু কুদি,
সিদোল্ দলা মুরিচ্ বাদি,
উলু কুরবো গুরিদে।
আড়' মাধাদি গত্তনা বাহবে,
উলু কুরবো চাবে চাবে,
ছিচে ছিচে ও পরানবে...
মরে ডাগিদে।
কধে কধে লেত্য এজেদে।।।

২.

তেদোই কুরবো বীজি সমত্,
জীংকানি সুত্তো থেব' মনত্।
ভুদি কাবি গোষ্ঠোঁত্যা কুরবো,
গরাজত্ চাবে তিন্নো চেরবো।
আধিক্ ঝালে জিল্ তিত্তিরায়!
আধিক্ হরয়ে দাত্ শিরশিরায়।
নাঙ্ ঘিনিলে লেত্য খেরখেরায়।
এক্ চাবানত্ চোঙ্কুন্ ঝোরবুয়ো!!!

৩.

কান্তোলো মুজিত্ বড়ই পলে,
বীজি ফেলেনেই গমেদালে।
হর' হর' কচ্ কচ্ গুরি,
খাদে লাগে গম্।
চোরবেকগুলো আ কাজা আম্,
মাত্রা-চিন্দ্রা কাজুবাদাম্,
ছুচমরিজোত্ সিদোল্ পলে,
তারেও ন' কুয়ো কম্।।।

সনার আঝি

পোখ্যা ফুলর পাগোরান্,
সনার চিজির্ আঝিয়ান্।
সনারচিজি গান্ ধুজ্যে,
শুনদে শুনদে কান্ ভিচ্যে।

দাধা যিয়ে বাজারত্,
বাবা যিয়ে জুমকাবা।
ভুজি যিয়ে কুয়োগাঙত্,
মামাহ্ যিয়ে তোনতোগা।

ছ'বাই তারে ন' লাচ্ছুয়া,
তা লগে লগে ন' পাচ্ছুয়া।
আঝি আঝি চে আগে,
মনত্ তুলি কি মাগে।।।

বো হঝা

ডাঙর্ দাধা খবং বানি,
জুম্ম ছিলুম্, ধুদি পিনি।
বোহা আধত্ চিগোন্ দাধা,
সাজিত্ তলে আগা পাদা।
ঠেঙধোচারিত্ পানি নেই,
বেক্ কামানি রয়ে পুরিনেই।
সনারচিজি বো হঝা যিয়ে,
ঠেল্যা পুল্যাঙ্ বুগিনেই।
বো'বুয়া কানের গুজি গুজি,
দাধা মনান্ হুজি হুজি।
পানবাতে এল'গোই ওঝারে।
আজু চলাআপ্ খীঝারে।

মুক্যা গাজত্ চগদা

মুক্যা গাজত্ চগদা,

মামা কো ধুজ্যে অকধা!

জুম্ রাগেইয়া কিয়য় নেই,

পেবার ছলাত্ তেহ্ আভিলেস্ খেই।

পত্তি ধান্ শিজ়েত্ উগুরিক্।

ন' পারর! বেন্-সুধো কাম্ ত'গুরি!

বাবা ধুরিল' এক্ লামা!

বেবে মনান্ অল' শ্যংসমা!

ইজোরো মাধাদি ফুঁজি দুবো।

ভুজি কয়দি কুবো? কুবো?

চিহ্নেফাস্যা ফেজাকচাক্।

চুমি চেলে কেজান্ পাছ্???

সুঘোর জীংকানি

কুইয়াং আলুলোই বাচ্ছুরি টং,

ছিদোলে কালা অয় সং।

লাঘা লাঘা বাচ্ছুরি দিক্,

ভাত্ পোইলগত্ মুরিচ্ দিচ্।

ফুঁজি পুড়িবো তোনানত্,

মেজাঙত্ পোই, বোইনে ছানানত্।

মিদিঙা চুমোত্ ছেজক্ শাঁক্,

বাড়িবে পাদা পোইয়ত্ আভাকভাক্।

আঝি-খুঝি মোক্কো মর,

জুমো তাকঠিগিনীত্ মোনোঘর।

ঝালে পুড়িবো চোগোত্তুন্ পহন্ পানি,

ইয়ানি কয়দি মর সুঘর জীংকানি।।

বেলেইয়োর ঘুম

সুধো ফালিত্ বেলেইয়োর ঘুম।

বানাহ্ তগায় কুনদি উম্।

বানাহ্ ভাত্ দিলে মূ ফেরায়,

রেত্য এলে ঘর বেড়ায়।

দাড়ী চলে ফুরুং ফারাং!

উন্দুরে গত্তন্ ঘুঙ্গুরুং ঘাঙ্গারাং!

চোলো গুজিত্ উন্দুরো বাহ্।

লুধুরো লুধুরো পো-ছা।

বুঙত্ দিলুঙ পেত্যপাদা।

উন্দুরে গল্লাক্ ছাড়ানাদা!

দুংকাম ধানুন্ উন্দুরোর জু।

বেলেইবো ঘুম্ যার উভো মূ।।।

চ'গদা

চগদাবুয়া ডগরের ধেধেক্ ধেধেক্।

চিজি আঝের কেদেক্ কেদেক্।

গুইয়াম্ পাগানা ইক্কোও নেই।

চগদাবুয়া খায়য়োই পাড়িনেই।

বাদি গুইয়াময়ুন্ লাক্ ন' পায়।

ছীয়ো বাচো জরা দি দায়।

কহরা গুইয়াম্মো চাবেল'।

দুধো দাত্তো ভাঙীল'!

বগড়া দাত্তোই ব' যিয়া আঝি।

মামাহ্ মনান্ হুজি হুজি।

গাজ' খেলাত্ চ'গদা।

চিজি কো ধুজ্জোগোই অ কধা।।।

মিলনি পাদার ন’

মিলনি পাদার ন’,
পেত্য পাদার পাল্।
এই ন’ য়েব’ দেজ্ কুলে,
সত্তা, ধুরুং খাল্।

কেঙেত্ কেঙেত্ দাড্ টান’,
তুবোল্ উধের গুজুরি!
এন্তে ছলাত্ কানং কানং,
সনার চিজি নাগুরী।

শোরবো আমিলেত্ মোঁইকাঁঙারা,
গেলঙ্ ধানর ভাত্ মজা।
কম্বা কম্বা সুধোফালি!
অইয়ন্ ভুত্ পঝা!

ঠেঙত্ খারু, কুজি খারু,
এ্যাধ’ দাধ’ বাঙুরী,
দোগান্ বাহঝি কিনি দিম্মোই,
ছারা দেধে নাগুরী।

সাজেক্ কুলন্তুন্ লত্ দি,
কান্তে গধাত্ ভিরেম্মোই।
রাজার’ পূন্যাহ্, কদলপুর,
বুদ্ধমেলাত্ ঘুরিম্মোই।।।

তদেক্

জুমো লেজাত্ চাক্কো গাজ্।

তদেক্ পলে কেজান্ পাছ্।

মামাহ্ কুয়েদে গুজ্জে দে।

বাবা কয়দি থোক।

তদেগে নিলে ধান্ শিজ়ে,

পুল্যাঙ্ ভরন্ লোচ্।

ছিচ্যে মরা আধা জ়েদা।

তদেগ' হলে ভেধা ভেধা।

ডাঙ্ৰ দাধা শাহর বানি,

তদেগ' ছ' দেল্লোই আনি।

তদেক্ ছ' পালেব' নাগুরী।

চে' রয়েগোই আ' গুরি।।।

টুত্রিং টাত্রিং

কত্বাহ্ কত্বাহ্, টুত্রিং টাত্রিং।

গল্ল' চিজি কুত্তিং কুত্তিং।

পদনাবাচ্চুরি শাজ্ কম্।

আলু মিজ়েল্ পলে গম্।

আলুয়ানি বেক্কানি শেজ্ গল্ল'।

আলুপাদা তালু ন' অল'।

বেগুনো হরা মিজ়েল্ দো,

ফুঁজি পলে ছ্যা ছাড়িবো।

উদত্ থুদত্ পানি নেই!

তোনো তাবা গুগেনেই।

পুল্যাঙ' তলাত্ বেগুনো হরা,

সিগুন্ তগাদে আধামরা!!!

ধুধুহাঙ্

ধুধু ডুডু কাঙারাঁ হুহু ;
সাজুঞা মাধান্ ভুহু ভুহু।
চিগোন্ ছড়াত্ ধুধুহাঙ্ ;
দাড় ন' হাং চাক্ হাং।
ঝবাত্ ঝবাত্ উড়ি যার ;
শিলোত্ থোনেই কাঙারাঁ দাড়।
চিজির ভাগত্ কাঙারাঁ দাড় ;
লুচ্যাং বেলেইবুয়া লুবকুদার।।।

তিদাশাঁক

কুজি রাইঞাত্ চঙঁরা।
রুয়োঁ বাজত্ ভঙঁরা।
রাইঞাঁ ভুইয়ো তিদাশাঁক।
নিলে গুলোদক্ বাচে থাক্।

গেল্লে সাপ্তাত্ বাজার বন্।
খিয়ে নেই উজুনো কনজন্।
উত্তোমাজান্ ছিনিপোল্।
মিজেল' দুলো উভোদ্ ওল্।

বেলেইয়ে নিল' শুণুনো মাজ্।
মিজেলান্ খেলগোই কুগুরে।
উভোদ্ পুন্দুরি জেদতেল' বদল্,
তিম্মো ফাধালা উগুরে।।।

হক্কেং

ছড়া আগারে হজ্জা গাছ,
কস্বা সুরুং তার!
এধেদি চলে ধল্যাচরত,
টুথ্যা বুইয়ার বার!
বুজ্যা আজু হজ্জা গাছো,
গুচ্ছেং গুচ্ছেং!
গুনি ন' পারে কাঙ্গিলিত্যা,
হক্কেং হক্কেং।।।

বলাঞ্যাঁ

দুরোদুরিত্ মামু ঘর,
সান্তো মোনো ওবোলা।
মুড়োমুড়িত্ মজা ঘর,
বেক্কুন্ অলাক্ জুম্ বলা।

মামু খেব' নুও ভাত,
ভাগিনেয় পেল' বলাঞ্যাঁ।
রাদাঁ ডাগত্ লর দিল',
সনার চিজি পরাঞ্যাঁ।।

থেবুরুতটেঙ্ থেবুরুতটেঙ্,
ঠেঙ' মুড়িত্ শন্ কাদাঁ।
আঙুলো ফাগাত্ ইয়ান্ কী????
হন্,, কেচো মাদির ঘু'দলা!!!

কাঙারাঁ ধরা

লদক্ ধধক্ মোনোঘর ;

বারেদি বাচ্ছে জুনোপহর।

কিজিক্ কাজাক্ গুরো ঝাক্,

ওজোলেভাঁন্ হয়ে ফেল্লাক্।

মা-বাপ্ যিয়ন্ কাঙারাঁ ধরা,

ঘিলুক্ দলা এগাহরা।

পবং পবং কধা হঅ,

পাল্লে আর' লাহরে যঅ।

বানেমরা দগা কেম্,

চোগেদি ন' দেলে হেনে যেম্।

চিগোন্ ছড়ান্ পাদা ঝুড়ি,

মাছ্-হাঙাঁড়া ভরাভুরি।

যুনি বেহ্ পারজ্ চাদারা,

ভুত্ পারা পারা কাঙারাঁ।।।

বো চা

লুরান্ অয়ে জুরো জুরো,

অদ'গত্ উত্তে উমোকুরো।

বীজোর রাদাঁবো ধরা পোল্,

যাদি গর' জায়জুগোল্।

আবাদা গুরি সধ্যা নাধ্যা,

চঅলাং চঅলাং মুরিচ্ বাত্যা।

কিরিং কিরিং তোনো ঝুল্,

দেঘা যায়দি ঠিগিনী চুল্।

নুনো জাগাত্ নুন্ নেই,

তেল' জাগাত্ তেল্।

চারবোপেদীরে বো চা এনেই,

বেক্ ইজ্জত্তানি গেল্।।।

অদ'গত্ - কুরো যিয়ত্ বদা পারন্।

চঅলাং - নিঘুচ্ ন' অয়ে মুরিচ্ বাত্যা।

চড়ই বাহ্

দগিন্ দোরি মজাঘর,
ধান্ তলোইবুয়া ইজোরত্।

ফেজাহজার চড়ই বাহ্,
*তুলিউজু **পেজারত্।

ধান্ তলোইয়ত্ চড়ই ঝাক্,
ছুলি হাদন্ ধান্।

নানু ঝুরের চানাহ্ ভুরোত্,
চাবাং ন' চাবাং পান্।

রুয়ো বাজত্ তুলোন্ টাঙে,
চিজি তুলের তুলোনত্।

উল্লে ফেল্গোই ছুচমরিচ্চুন,
ইক্কোও নেইয়ার কুলোনত্।।

*তুলি- ছনছিনি ঘরর চালর বেঘত্তুন্ অজল্ জাগা।
**পেজার- ছনছিনি চালর ছনর ইক্কো ইক্কো ঝাপ।

দ'ছজ্যা

হগড়া ভাদত্ নুন্ গুলি ;
খে লগোই য' মুলী মুলী।

সুঞ্জুগো জুমান্ *আরেঙ্ ওই ;
কত্তাকুত্তি ফেলা গেল'গোই।

কোচ্যা দাধার ঘর বেড়ানা ;
বুজ্যা আজুর পেরপেরানা!

ননন্-ভোজোর গপ্ সপ্পানত্ ;
বেল্ দীবোর পধর আদানত্।

দ'ছজ্যা ঘরর ঝাঙ্কুয়া খানা ;
কাম্ পরেদে দ্বি আধ্ বানাহ্।

**ধুঙুরী মত্তন্ মামা, বাবা ;
***ছাবাক্ জুমোত্ নেইদি ছাহবা।।।

*আরেঙ্-পুরোনো অধেঅদ, নিবিলা। **ধুঙুরী -জিরেন্ নিয়া গুরি। নিত্য।
***ছাবাক্-পরিষ্কার, কোনো আড় নেই।

বাজে ঘর

ছিনেছিঞ্যাঁ বাজে ঘর ;

পুরি এল' ধহল্ পহর।

রাদায় ডাকহাল্য কেক্কেহেঁক ;

নাগর্ মান্তন্ ঝাড়' পেক্।

পইঁত্যা ঘুম্ লেজা পুরেয়ে ;

ঝাবেয়া *রুয়ৌঁবুয়োও থুম অয়ে।

ফুদো আঙারা ওলোঝোল ;

হগড়া ভাদত্ **আম্মো পোল।

বাবা ধারাল্লোই তাগলান্ ;

মামা যিয়েগোই কুয়োগাঙত্।

সনার চিজি ***কাত্ অব' ;

বই-পত্তর মুজুঙত্।।

*রুয়ৌঁবুয়োও - যে দারবুয়া সারা রেত্য জেদা খেবাতে

ওলোনছালত্ ছেই ঝাবে দি রাগা অয়।

**আম্মো- ছ'কালি জমা অদে অদে যে কালি/কাজর জমা বদে।

***কাত্- কাবিল্, পাঙগা, শিক্ষিত'।

জাল্ বাহ্

দুলো ধুরি থাক্ পরান্,
মুই জাল্ মারং।
চুমো খেবাং দি খেবংগোই,
বেঙ্কুনে পেঠ্ ভরন।
মিলনি পাদা গজর গুরি,
দুলোবো দে ধীবে।
দুলো বে উধি মই কাঙারাঁউন,
নিগিলি যেবাক্ চ্যে।
শিলত্ তলে জেত্ কাঙারাঁ,
কাল্ কাল্ দাড়াঁ।
*ধুধুগোত্ চেলৈ বানাহ্ ইজা-মাজ্,
অজল্ রিঝাঙ্ পাড়া।
চবলক্ চবলক্ ন' যেচ্ পরান্,
ইজা-মাজ্ ঝাঁক্ অবাক্।
জুচ্ জুচ্ গুরি হুচ্ বাড়ে,
ম' পিচ্ছে থাক্।
মানেক্ ভেগেনা, পাত্তুরি ইজা,
ইক্কোয়ো বাদ্ ন' দিচ্।
টারেঙ্যাঁ বেঙ্, কোরহুরি বেঙ্,
শিরেয়ুন্ চিবি দিচ্।
নুন্-অলোদ, মুরিজ্ ফারি,
হলা গুরিলে।
চনাহ্ চনাহ্ বাচ্ নিগিলি,
লেত্যে ঝুড়িলে...।
চনাহ্ ভুরোত্ বজিনে,
গপ্ মারি মারি খেবংগোই,
পরান্ দ্বি জনে।
কলা পাদার বিজোন্ বিজি,
গরম্ ভাত্ জুরেবং।
মুলুক্ মুলুক্ দাড়ানী,
চিজিরে থোই দিবং।।

*ধুধুক্ - জুড়িত্ পানিয়ে গাত্ হুচ্ছে মোরোঙ্।

তিমপুর

ছ'কুড়ি টেঙাঁর রুবোরাদি ;
তিন্ কুড়ি টেঙাঁর পিনোন্ খাদি।
মালাহ্ শুগোর ইক্কো পাচ্ মুত্যা ;
মদ্ দ্বি হুম্ দক্ মুখ্যা।

জরা কুরোবুয়ো লক্ষীয়ে পায় ;
আনি পেবাচ্যা হামাক্কায়।
*সাজং সাজং বো নিবা ;
**বেঙ্ পাখি ঝাক্ আনিবা।

বো লামেবা, ঢুলো ডগরে ;
বো পুর আয়ুন্ মাজ' সোমবারে।
দাবাহ্ টেঙাঁ বাদ্ দিলাক্ ;
তিমপুরো খানা ছিরেলাক্।।।

*সাজং- এক্ দিনো ভিদিরে। বিঞ্যাঁ পহত্যাভুন্ ধুরি বিল্যা সং
এক্ ছলায়।
**বেঙ্ পাখি - বাদ্যযন্ত্র বাজেয়া ঢুলি।

টঙঁ ঘর

ধুধুক্ বে' বে' তেত্বেতুক্ ;
টঙঁ ঘরত্ ভজান্ সুখ্।
পিবির পিবির বুইয়ার বায় ;
কাষ্ট কিয়া জুরে যায়।

*শিঙেঁ বানে ২*পার্বীয়া বাজ্ ;
রেত্ নীঝি অলে শুনি থাক্।
লাঙ্যাঁ-লাঙোঁনী মন্ কধা ;
কোই ন' পেলে মন্ কাদা।

জুমো তুগুনোত্ ঝুরুর গাজ্ ;
টঙঁ ঘরত্ পার্বীয়া বাজ্।
পার্বীয়া বেততোই ভিরি বান্ ;
তদেগর জু পাগানা ধান্।

দেবায় গল্প' ঝড় মূঘী ;
চিগোন্ দাধা যিয়ে জুম্ চুগি।
গায় গায় আগে টঙঁ ঘরত্ ;
চিত্ ন' ভিজের পরানত্।।।

*শিঙেঁ - ১০/১২ আধ্ লাম্বা বাজর বাদ্যযন্ত্ৰ। যার র' ২/৩ মেল্ সং
শুনা যায়।

২*পার্বীয়া - একজাত্ বাজর নাঙ্। বুনোহাদাত্ বেশ্ বেবআর অন্।

মল্যে ঘর

কিলোই খিয়চ্? মোজো দই।

কুবোত্ খিয়চ্? পাদা পোই।

আর' কি? চাম্বা কলা।

বিনিভাত্ ঘাঙে মিধে দলা।

পেঠ্ ভুচ্যে? তিগুত্ তিগুত্।

পেদ' আদুরি চিগুত্ চিগুত্।

আর' খেবে? ন' খেম্ ন' খেম্।

কাটোল্ গাজর ছাবাত্ যেম্।

কাটোল্ গাজত্ ঘিলালুদি ;

বিঞ্যাঁ পহঁত্যা চোংকুন ফুদি।

হিরিঙ্ হিরিঙ্ ধুলোনা ;

মল্যা ঘরত্ বেড়ানা।

নাদেং

ভুদেমারে ভুদেমা ;

কোইদেনা তুই কোইদেনা।

নাদেং তোগে চুপ্ ন' পাং ;

মামা ডাগের ওয়াং ওয়াং।

বিনি পিধে, শাম্মি পিধে ;

জেদেনা খৈয়ত্ দলা মিধে।

মুই ন' খেনে তরে দিম্ ;

সে বদলে নাদেংয়ো নিম্।।।

মর লাঙোনী

চুলেমূলে লাচ্যা হুল্ ;
পোড়া ঘুত্যা কিয়া রং।
মুজুঙো দাত্ ইক্কোও নেই ;
আর' নেইদি চোগো বং।

আধ্ ঠেঙানি লিভিঙ্ লিভিঙ্ ;
উত্তান্ চলে ধোলিয়া।
যেন্, বুদু ছিনা শুগুরিগুলো ;
হিয়োই নেই মোলিয়া।

বুনোহাদায় পাঙগা ;
কোনো কাম্ বাগি নেই।
দিয়েল্যা সুধোনাল্ পাদাস্যা গুরি ন' পারে ;
পিনে পুরিবো কিনিনেই।

মরিচ্ দিলে অলোদ ন' দে ;
সিদোল্ দিলে নুন।
কোই ন' ফুরোয় সেদক্ আগে ;
মর লাঙোনীর গুন্।

মনান্ তার ভারী দোল্ ;
চোখ্ পিজিনে রিনি চায়।
দিম্মো এলে যাজার পুরোয় ;
পর' হুতুরি মাধি পায়।

মাঞোঁ নাঙেঁ এলাফেলা ;
মুই তা নাঙেঁ রাধামন্।
তারে লোম্বোই হামাক্কায় ;
জীংকানি মনলে পাদারি অং।।।

জুম্

পেত্য ফিড়িঙয়ো বদা পাচে ;
ধান' পাদান্ লুঙি পোচে।
নিবিলি ছেরে মাত্ৰা করাহ্ ;
ফুরি ন' পারে বন্ ফরাহ্।

ফুরি এলুঙ্ ধাপ্ দজর ;
বেগুন্ ন' পেলুঙ্ এক্ ছাজর।
ধানে মারিল' বেগুন্ গাছ্ ;
হুচ্ দি ন' পারে ফুঁজি বাচ্।
বজরর রিত্য ধানে, ফুঁজি ;
তা'আব' মুয়োন্ হুজি হুজি।

*ধোই মাধালোই বেন্ বাজেইয়ে ;
সনার চিজি আজের নেইয়ে।
সনার চিজিরে কী নেজে দিম্ ;
ফিড়িঙয়ো বদাবোলোই বুজ্ দিম্।

*ধোই মাধা - বেন্ কাবিলে যে সুধো মাধানি থায়।

আলপালুনি বন্ধ

তেদের তেদের দেবা ঝড় ;
ভুইয়োত্ উয়ে পানি।
বোল ন' খেলে তোগে আন',
ছিলুম, ফাদাঁ কানি।

কুদু পেবাহ্ ফাদাঁ কানি ;
কোনাকুনিত্ তগঅ।
বোল বানিবার দুরি ন' পেলে ;
ফারোতদুরি হগঅ।

উচ্চো ফুচ্চোই হারা অবং ;
গোদা দিন থিয়া।
আজার মাস্যা ঝড়ত্ ভিজতে ;
লাগে বলপিয়া।

আলপালুনি বন্ধ পিয়েই,
দেবাই ধল্য দর।
রেত্ ন' অলে নাঙ্ ন' ঘিঞাঁ ;
কিয়োজনে ঘর।

দল্ নেই, পাটি নেই,
নেই ভাগাভাগি।
সুরবুদি বোলো মুখ্যা ;
বানাহ্ তাগাতাগি।

বি দ্রঃ- ইরুক আলপালুনি নাঙে কোনো বন্ধ নেই।

তেনতেঙুরি

পিজুম্ বাজত্ তেনতেঙুরি ;
হুতুন্ উড়ি এলে।
বাচে থাক্ লেজত্ ধরঙ্ ;
শাম্মি পিধে খেলে।
বাবা মলের শাম্মি পিধে ;
মামাহ্ দেল্লোই ঘে পিলা।
জুরগো উরে আর' আগন্ ;
খাজুরো মিধের খৈ মলা।
উত্তোমাজাত্ নুন্ চুমো ;
লুডুঙ্ ভরন্ মাছ্।
ধুমো উজু নুনোমাছ্ ;
আর' কি কি চাস্?
উড়ি বেড়াস্ ইন্দি উন্দি ;
দুনিয়ৈ খবর পাহছ্।
দেঘে দিবে? কুদু আগন্ ;
পিত্তুঙ্গলো গাছ্।

পেত্যো ফিড়িং

চুপচাপ মাঠ্যা সাপ ;
পেত্যো ফিড়িং চুন্ধি থাক।
ভিরেছ রাজার হুগুম উয়ে ;
ভুইয়ত চহতন চনাহ্ ঝাক্।
আন্তুবো বাজর চুমো ছাড়ি ;
তুই আগছি য়েল্ পাদাত।
চোখকুন ডাঙ্ৰ, শিরে চিগোন ;
সবাই গুত্তে নেই মাধাত।।।

সনার চিজির বুগোপাদা

খিদির থাদার সনার চিজি,
মারের গপ আঝি আঝি।
য়েত্ মারিম দাত ছাড়িম,
আধ' চাবরত্ বাঘ মারিম।
গুজদি লামিল' বাঘ তোগা,
এক্কো আজারত বেঙ্ চাগা।
চিগোন বেবে হুচ্ছে মুচ্ছে,
চিজিরে তুলিল' পোচ্ছে পোচ্ছে।

বোলী পিনোন

সং নেইয়া আগা হত্তাহু,
লাম্বা-বাধি সুধোনি।
দেহরি-লাম্বা অইয়ে হেনে,
টান্হো বাজর জুদোনি।
থুর চুমোবোত্ সুধোম্বুলি,
ছ'বাই পাক ন' হার।
জু দর' উয়ে বোলী পিনোনানু,
এক্কাইয়ো বাক্ ন' উজার।
চিজি গরের তেনেন তেনেন,
টানি দের ব'কাদি।
ভুজি তুলের বেনত ফুল,
ন' মাধি ন' বুলি।
সুধোম্বুলিত পুজ্জেন' সুধো,
নানু ভরের চানানত।
মাজ্জেন্ দাধারে বো আনি দিবং,
কাদি ন' অলে আউনত।

*জুদোনি - বেন' গর আ টান্হো বাজর মধ্যে দুরির অহলগা।

মাজ' জু

বড়গাঙ্ আগারে গল্প' বান্,
এধেদি অল' পানি।
মাছ উজাদন সুরঘাত্যা,
নল-হাগাড়া ভাঙী।

জুমোর মাধাত্ দাধাহ্ ভুজি,
গজ্জা ভুইয়ত যেই।
হাবি আনিলাক ঘোঞাঁ মাছ,
ভরন দ্বিবা লেই।

ওলোদ আগে নুন নেই,
বাজার অল' বন্।
লক্ষী ভুজির ভাজে ন' হুলোর,
হিঙোরী শুগেই থন।

আজু হয়দি পিজেদি ফার',
দাধাহ্ হয়দি বুগেদি।
বাবাহ্ হয়দি শিক্ গাধ',
মুয়েদি ফুরি লেজোদি।

মাধা রাঙা জুম্মোধান

মাধা রাঙা জুম্মোধান,
ঝাঙ্কুয়া অলাক হাউয়া।
যা ধগে তে আজের নেই,
কিয়য় নেইদি রাউয়া।

ধুধুক বাধন চগদায়,
গাজত্ উদিনে।
তদেগে দেদন শিজৌলী হাবা,
মালিয়ে ডাগিনে।

পাল্লো শুগরে তলোই বেঝে,
রেত্য মারন ধান।
য্যেতুন আগন আলাভলা,
ইঅ' থান ন' পান্।

উয়ুরিক পেঙ্কুয়া ডলং বুনের,
হাচ্যা বেত ফিরি।
হোচ্যা দাধাহ্ গাবুর পাঘি,
আদাম বেড়ার ঘুরি।

হে পুরেলাক! হে পুরেলাক...!!!
গোদা জুমান্...!!!!

*হাচ্যা বেত - যে বেত্তানিত নিল বুক্কো দি ধাক থায়।

পদারার চাংমা লেঘা

চেজেক্ চেজেক্ ভাত পিলা,
চজর চজর তিবিরাং গুই।
পখত দেলুঙ চাংমা লেঘা,
উগুরি ইদিলুঙ মুই!

হোজিয়া! নাহি চালান্ দিয়া,
পখ' জগা আং।
গাধি বুর পারি ধাভা ধাভা,
বৈদ্যিয়া ঘরত যাং।

বৈদ্যিয়া দিল' নীধিং চেই,
তন্ত্র-মন্ত্র গুরি।
মনান মর দাঙাঁ যার,
উভোদ যাবত গুরি।

আঝি

আগাজত জ্বলদন চান-তারা,
মস্তগত চিজির আঝি।
এ আঝি পেধা নয় দিলেও,
সাতরাজা ধন আঝিপুঝি।

অ'লে ন'বঅ মায়ানা পেবাহু,
যুনি চেলে আওচ গুরি।
মনে মন মাঝি দিলে,
ন' লাগিবো হানা হুড়ি।

বিনি ধানান মুজিয়ার

লুক্কি চিজিক চুক্কি থেচ্,

হুজি চিজিক্করে তুই ধোলেচ।

ত' বাবে যিয়ে হাট্টোনত,

জুমান আগে আদানত্।

বিনি ধানান মুজিয়ার,

চগদা, বান্দরর, পেক আধার।

পুল্যাঙ পুড়়েলে মুই ফিরিম,

বিনিহোগা পিধে বানেই দিম্।

মালাহ্ শুগোরবো হাবিলে,

পিধে হেবার তেল পেলৈ...

চাগা চাগা নারিহুল হুদি,

মারেপিধে, বেঙপিধে দিম্মোই ডুগি।

—চিজি ঘরত থাক ব'জোচ।

বান্দরে শুগাদন ধান

চিভং ভুইয়ত মিলোনি পাদা,

চাক্কো গাজত্ পান।

বেলান ডুবেল্লোই আঝি আঝি,

বান্দরে শুগাদন ধান।

মামাহ্ দেল্লোই তোনো তাবা,

নানু ভাঙেৰঁ হাঙাড়়া।

ফোবে ফোবো চিজি এল'

ধাভা উড়িঙ চঙ্ৰা।

হুদু? হুদু ধান তলোই,

ধান শুগাদন বান্দরে...

ওবাং পাদারে হাঙাড়়া চাক্,

উল্লে ফেল্লগোই নানুরে!

চিজি ইক্কে মামু ঘরত

বার' বক্সরে (বতসরে) ভাগিনে এল',
মামু ঘর ভিলি।

হেবার-দেবার আলুলো দুলুলো,
হিয়য় ন' গুজ্জো হলি।

জুরগোত আগে হাধি মিধে,
চুমোত আগে দই।

লক্কি চিজি সনার গরবা,
আগা পাদার পোই।

পোগোন ভরন সান্নি পিধে,
হক্কে অহতাক হিজেনি।

চাঘি চেলে হেই ন' পারে,
বেক্কুন অহলাক আনুনি।

ওলি

ত'আবে (বাবা) যিয়ে হাট্টোনত,
ত'মা (মাহু) আনেল্লোই পানি।

ত'নানু (নানু) দিব' হুচ্ছে ভরন,
পিত্তুংগলো আনি।

সনার চিজি ঘুমান যা...

ঘুমান এজের লাঙেল দিঘোলী,
জুমোর মাধাত দিনি।

ঐ... ঐ... ঐ... ঐ...

পিদিত দিলুঙ রাজার বিচ্ছেদ,
শুনিথাক চিক্কো কবির পশ্চন।
... চৈতমাস্যা হরানত,
...নেইদি পানি ছড়ানত।
ই... ই... ই... ই...

বুড়ি হয়দি মুই এক হলুঙ হাং...
বুজ্যা হয়দি... ধুর!
কবি মাবো এনেহ্ এনেহ্,
এক্কে উয়ে দুর।
ঐ... ঐ... ঐ... ঐ...

আগারেদি গেলে চেয়োত বাজিবে...
এধেদি গেলে দুবোত।
বড়পেদা এজেরবো... দুলো ধুরি,
পোল্লে থাক্কেই দুরোত।
ই... ই... ই... ঙ্গ...

পেতো পাদার হোগা পিধে,
মূয়োত বাহব্বী থায় সেধক মিধে।
সনার চিজিক্কো ঘুম য়েব'...
বিনি হোগায়ুন গাই হেব'...
ঐ... ঐ... ঐ... ঐ...

ওলি ওলি... ওলি ওলি... ই..
... হিরিং হিরিং ধুলি।
এই ঘুম আনিল' হত্তাহ্ বাবু,
সনার পালকিত তুলি।
লোক্খি চিজি ঘুম য়েব'...
ওলি ওলি... ওলি ওলি...
ই... ই... ই... ঙ্গ...

বোলী

চুলোত দিলাকোই চুলচারুক,
তদাত দিলাকোই আহজুলি।
টেঙাঁছড়া আর আলছড়া,
হানত দিলাকোই ঝুমোলী।

হজ'ফুল আর আন্দিক,
আর' দিলাকোই রাজ্জুরে।
আধত দিলাকোই হজিবাঙুরী,
বালাহারু তাজ্জুরে।

ঠেঙঁতহারু ঝনাত্ ঝনাত্,
ফুলহারুয়ানি দোল।
হুবোন থোনেই হুবোন পিনের...
নো'বি অল' ওল্।

হেল্যাআঙুলোত সুধো বানী,
ডাঙঁর ভুজি বো তুলি,
বেড়' মাধাত্ টাঙেঁ থলাকোই,
তুমবাচ্ তেল' শিঝিলি।

মারেহ্ পিধে

ধান তলোইবোত ছরমা ছরো,
ছিয়ো বাশছো হোই...?

নানু ঝুরের চানাহ্ ভুরোত,
চুধো চুধো বোই।

ছরো ছ'উন চিরিং চারাং,
উধি ন' পান্ডন ইজরত।

মামাহ্ বানার মারেহ্ পিধে,
নিজেস নিইয়া পিজোরত।

বাবাহ্ আনেল্লোই আগা পাদা,
চিজি ধুলের ঢুলোনত।

চাল' উগুরে বীজ বীজিদি,
রোদে গুগাদন কুলানত।

ছাবিনেহ্ ...

মোঁই হাঙাঁড়া চাক্ সমত,
শোরবো আমিলে যুনি থায় মননত্...

হে চিয়ো...

ফুদে না ন' ফুদে পরানত্।

হেব' অলে আর'...

পদনা বাচ্ছুরি দিগে টঙ্,

থেলে আদাফুল মিজেল্ দ্যঙ্।

...গঙালে দিনেই সুজ্ মুরিচ্,

...আগা পাদালোই টিবে দিস্।

মিজেল্ পুরিবাক্ বদাবলাহ্ ঘুঁঙুরো।

দাজ্যা ইজালোই শিরেবলা হুমুড়ো।

ভাত্ পোইলগত্ মিঞা' শাক্,

হেলে গুলোদক্ বাচ্ছে থাক্।

জুম্ববী হব' আঝিনে,

আহি বাঝাবিজোও...

--- হেলে হেব' ছাবিনেহ্

মিজেল' দুলো হার্বারী

ইজে-মাজ্ তোগা হাঙাঁড়া ধরা,
মিজেল' দুলো হার্বারী।
পরান্ লিলিক্যার সোধ্যা মূ,
ভাঙাঁচাঙাঁ ঘরবাড়ী।

উস্তোমাজাত্ উন্দুরো জু...
চাজাত্ থ'লে বেলেয়ে।
হুগুরবো হেল'গোই বেরমা মাজ্,
পেঠতো অল' ছেলিয়া।

ইচ্চা এব' তেহ্ শুনিবার,
গোদা সাগ্গা উজুনো।
লুরান্ চুগি ছরমা হরো,
আঘে বানাহ্ পুজুনো।

সনার চিজি গাজ্ বান্দর
গাজত্ উদিলে গাজ্ বান্দর,
মাধিত্ থেলে ধল্যাপুক্।
ঘরত্ থেলে পেনেন্ পেনেন্,
নিত্য গরে জাগুলুক্।

দিম্মো এলে তদক্ তদক্,
সিংগবা পঝা পিজোরত্।
গুধি ভিদিরে ছাম্মো হাঝা,
ওবাং পাদারে ইজোরত্।

যেক্কে অয়ও নাগর পুন্ডিক্,
হধানি গাজিক্ গাজিক্।
আঝিলে ঝুরি পড়ন্ চান-তারা,
হানিলে হুজি চিজিক্।।।

জারহাল্যা - (১)

ফুকপাক্ ফুকপাক্,
শিরোপানি ঝড়ফুদো।
দিম্মো বাধি রেত্য লাম্বা,
পহর অহবার নেই উদো।
ভাঙাঁচাঙাঁ হুরোলুর,
বেলেওর নিত্য জু।
ডাক্ ন' কারের ডাক্য রাদা,
এখকন্ উয়েগোই ভেল্ ঘু।
আজু গাহর গৌজেন' লামা,
নানু জ্বালের টাশ্চালান্।
কেরানিত্ তেল্ ভিলি ঢালি দেগোই,
উভোদ্ পুন্দুরি জেততেলান্!!!

জারহাল্যা - (২)

নাঙেঁ চাঙেঁ ধামানা বেড়,
ঝেলাং ঝেলাং বানাহ্ ছের।
ফিবেক্ বাজর হিস্যাবল,
আধতলা অজল্ আমততল।
হুয়োংয়ো উজোনি জুরো আহবা,
বেল্ ন' ডুবদে পড়ে ছাহবা।
পিয়োক্ পিয়োক্ জুরো আহবা,
উম্ ন' বজে আভাঝাভা।
জুম্ম সুধোর হেদার উম্,
যেদক্ পহর সেদক্ ঘুম্।
হগর-হাগার মজা ঘর,
পুনোত্ বাজিল' বেল' পহর।

চিজি আধত্ পিধে

জেদেনা খৈয়ত্ হাধি মিধে,
শাম্মি পিধেত্ ঘুছ্যা।
বিনি হোগা আধা বেশ,
ধুরি ন' পারে তুছ্যা।

চিজি আধত্ বিনি পিধে,
আধত্ বাঝছে লেবেদে।
মামাহ্ কয়দি পুড়ি দোং...
লুঙী দিল' সেবেদে!

বেলেইবো দিলগোই একো গাল,
মামাহ্ কল' ইঁহিঁ জঁক্!
তায়ারাত্ বাঝে হুয়েদ' যেনে,
গালত্ ফুদিল' নক্!

বিলেইবো ডগরের মিঞং মিঞং,
চিজি আঝের হুজিয়ে!
মামাহ্ ডাগের ওয়াং ওয়াং,
ছ'বাই ন'শনের আঝিয়ে!

হুত্ গোৰাম্

বাবাহ্ যেব' বাজারত,
মিধে আনিব' কিনি।
মামাহ্ দেঘোই ধান্ রোদোত,
বান্দরঅ নক্ বিনি।

হুতখুন্ হেবং হুত্ গোৰাম্,
মুলুক্কুন্ হেবং হোগা।
সিধেনদি আগন্ লাম্বা লাম্বা,
একতাল্ পার্বো ডগা।

জন্ গত্ গত্ ইক্কো ইক্কো,
দিবং হুত্ গোৰাম্।
চুমো ফারিমণ্ডোন্ মূও ভিদিরে,
ফুন্ দিইদি জোরাং!

ওঁ...উঁ...ফুঁ...ফুঁ...উঁ...ফুঁ...ফুঁ...
হি গরম...ম..ম...!!!
হি সোত্...ত্...ত্...!!!!

ছড়া ঈষে

দাধাহ্ আধত্ ফাগাড়া-তাগল্,
ভুজি মাধাত্ লুই।
পিচ্ছে পিচ্ছে তারা লগে,
দুলো আধত্ মুই।

দাধাহ্ কয়দি ছড়া ঈষি,
ভুজি কয়দি ছাগিনাহ্...
তিবুরুক্ তাবারাক্ পহন্ পানিত্,
হম্মা হম্মা বেগেনা!

দাধাহ্ দিল' কাণ্ডে গোধা,
ভুজি ঈষের ছড়া।
মরে হন্দে ছ'বাই ফেলে ন' দিস্।
চাণ্ডেলে দুলোত্ ভরা।

ইজে-মাজে এক দুলো,
বেগেনা হুবোত্ লোই?
ভুজি কয়দি চুমো কাপপোই,
কেবাং হেবংগোই।

রা বাঞেঁ রি

বামত্ দিলুঙ্ মোষ মারি।
য়েমান্ জাত্ চুরি চুরি...
বে-বামত্ বে-পাগে পুড়ি,
বাম্ ভাঙ্তী দুরোদুরি!

ইন্দি ন' পারঙর লুরিচুরি।
জেবত্ নেইদি কানাহুরি!
ন' পারঙর তোক্তিত্ গুরি।
গেঘেচ্যা, হাদন্দে ভেলে ধুরি ধুরি!

মাদিত্ ন' বাজে সং ঠেঙ' মুরি,
ধাবা এই সাঙু ধুরি,
হধান্ হল'গি টেনটেঙুরি।

মত্তুন্ রাগ উদি তরাতাঙুরি!
হধে হধে ঘেছেগুরি...
মনে হন্তে, রোদ্ ফোয়াং ভিদেফারি!!!
হা... হা... হা...!!!!!!

জুরপল্লা

পধ' পাজারাত্ চজর চজর!
দেঘা যায়দি ভেরাক্ ভেরাক্।
ভাঙী হোলুঙ পরাক্ পরাক্,
গরের ইক্কে তাদাক্ তাদাক্!

বেড়ুন্ ওয়োন্ ঝেলাং ঝেলাং।
ঠেঙদো চারিবো পেলাং পেলাং।
হন্যাঁ হধা হোই পবং পবং,
যা ধোজ্যোগোই গজাং গজাং!

উড়িংয়ো উয়ে চবাল্ চবাল্।
ছরমা ছরোবো হদাক্ হদাক্।
গরের হন্যাঁ হঝক্ হঝক্?
চিজি গরের তদক্ তদক্।

জুরো পড়িগেল্ পিয়োক্ পিয়োক্।
রাদাবো হি ওল্ নিয়োক্ নিয়োক্।
জঁঙঁরাবো হেলগোই ঘুঁঙ্ত্ ঘুঁঙ্ত্।
দিলুঙ্ সেবেদে কুমুক্ কুমুক্!

দোগিনো বুইয়ারান্ পিবির পিবির।
ওরোচ্য গরের বিবির বিবির।
চামিনী বীজিউন্ ভগদাং ভগদাং।
য়েত্য গেলগোই গল্যাং গল্যাং!

উগোল্ মাচ্ছুন্ ছল্যাং ছল্যাং।
হি চুর গুচ্ছেচ্? ফুল্যাং ফুল্যাং।
এজেঙে আঝি হিদিক্ হিদিক্।
অলাক্ নে ন' অলাক্ হিজেনি গাজিক্ গাজিক্।।।

ম' বল্ এক্কা

পোঅঃ... পোঅঃ...

ডবলা ন' হেই হাচ্যা হেচ্,
ভাবী চিদি আধ্ বাবেচ্।

বজেলুঙ্ হ্চ্ য়েদ' বলে,
লাড়ে পান্তে নয় হন' ধেলে।

পোঅঃ... পোঅঃ...

পোঅঃ... পোঅঃ...

আধত্ দিলুঙ্ ভাতজরা বান্,
ম' বল্ এক্কা, জুরে টান্।

টান্ টান্, জুরে টান্...
টেঙ' হ্চ্ বিজিদে আন্।

পোঅঃ... পোঅঃ... ।

সনার চিজি হেব'

দাধাহ্ যিয়ে দুখ্ হামত্,
বাবা যিয়ে বাজারত্।

টাঙে ন' থোই বাজার' ঝোলা,
চাজা জগাহ্ পিজোরত্।

ননন্-ভোজে হোচ্ পাহ্ পি,
পিজুমো পিজুমি শুড়ি-বোই।
বাজার' ঝোলাত্ বেরমা মাছ্,
ওলা বেলৈবো হেলগোই।

পিধে মজাবো সেত্রাং মেত্রাং,
হন্যাঁ সুমুরি দিব'।
বেড়ত্ আবুজে লান্হা হ্চ্যালা,
সনার চিজি হেব'।

ফুজিঁ

আমিলে ছিনিলুঙ এক গজর,
বাচ্ছুরি পেলুঙ এক ছাজর।
ফুজিঁ মিজ়েলে বাচ্ছুরি,
তুমবাচ্ তুমবাচ্ বাচগুরি।

হজি হজি ফুজিঁ দুবো,
হুবো থোইনে হুবো লবো।
উগোরেবারও চিত্ পুড়ে,
চুমি চেলে পেঠ পুড়ে।

উন্দুরোহান্ উল্

ও ভুজি, ছিনি ল' ফুজিঁ,
গুলোদক্ সাবারাং।
আবাদাগুরি চোয়োত্ অব',
উন্দুরোহান্ উল্ হেবাং।

মিজ়েলে-হজ়ালে, সাবারাং দি,
দিবে সুজমুরিজ্।
চাম্বাত্ বাক্বে সং মিদিঙেঁ চুমোত্,
তলেদি আগুন্ দিস্।

চনাহ্ চনাহ্ বাচ্ নিঘিলে,
বাড়িবে চানানত্।
এক্ গরাজ্ হেলে থাহর পেবে,
হি উদে মনানত্।।।

জেদেনা হৈ

বেগুন - মুরিচ্ জুম জগাহ্।
কিয়য় যেইয়ে নেই তোন তোগা।
চেজেক্ বুবুক্ পদ্ - ঘাদ্।
পা'ত্ ন' উদের তোনপাত্।

আজার মাস্যা দেবা দর।
হদক্ থে পারে বাস্কা ঘর।
দেবা দরত্ জেদেনা হৈ।
হাদে গম লাগে চানাত্ বৈ।

আঝার মাজ

দুরোদুরি মামু ঘর,
চিজি যেব' বজর পর।
উজুমহনে আঝার মাজ,
ঠেঙে ন' ছুয়োয় মাদি বাজ্।

এক জাগা হচ্ এক জাগাত্ যায়,
হাকে হন্যাঁ আজার হয়...
যাদে যাদে বেল্ দিবোর,
এক্কো আজারে তিন্ চিদোর!!!

চেজেক্ বুবুক্

চেজেক্ চেজেক্ ভাত্ পিলে,
তেদের তেদের দেবা ঝড়।
দ্বিবে গরুলোই খেদেক্ খেদেক্,
বামত্ বাঝে জুনোপহর।

দারবো অয়ে লেদা লেদা,
পিবির পিবির বুইয়ারান্।
গরুউন্ ন' আধন্ সুজুর সুজুর,
ঘরত্ রুয়ে জুমোরান্।

ভাত্তুন্ অলাক্ পেচ্ছাল্ পেচ্ছাল্,
হুজুক্ হুজুক্ ঘোরবোউন্।
দুধ্ ন' হেলে ঘিলুকবলা,
হেনে অবাক্ পোড়বোউন্।

গরু ছ'বো ছিয়ান্ ছিয়ান্,
দুনুম্ দুনুম্ হন্যাঁ যার?
হিল্যে হিয়ো পিয়ক্ পিয়ক্,
দুধতান্ উদুরেবো পেলাংবার!

ডিজিটাল বৈদ্যালি

উন্দুরবো গল্প' মোবাইল,
বেলেইবো ধল্ল' ফোন্।
মুইদ' ইক্কে ঘরত্ নেই,
এ্যদো শিরে মোন্।

ম' বুড়ির উয়ে মাধা পিড়ে,
দিধে তেল্ পুড়ি।
আগা পাদাত্ জেততেল' নাদাত্,
ফোনান্ থাক্ ধুরি।

অসুগে অসুগে বাজার বন্,
নেই হোনো তেল্।
ডালি, বাহঝা দেধে দেধে,
গদা জিংহানিয়ান্ গেল্।

মাধা উজু ফোনান্ ধুরি থাক্,
মন্দর জুবি চাং।
গম্ ওই গেল্ মাধা পিড়ে,
তুই থাক্ মুই যাং।

চিজি ইক্কুলোত্ য়েব’

মাধাত্ গুলি তুমবাচ্ তেল,
পিদিত্ বুগি বেগ্।
সনার চিজি ইক্কুলোত্ য়েব’,
মনান্ অয়ে এক্।

লুচ্ছেং ব়েলেইবো ঠেঙে ঠেঙে,
ইক্কুলোত্ য়েদ’ চায়।
কান্ ওক্কোরবো হন্ পাক্ হিয়ে,
ইও হবর ন’ পায়।

দাধা আক্কল্ বেভে পিচ্ছে,
মধ্যে সনার চিজি।
লুচ্ছেং ব়েলেইবো কানেল্লোই,
চোখকুন্ পুঝি পুঝি!

বেবে ব়েনান্ উদোনত্

টেঙা - পয়জা ব়োনোই আধত্,
রাঙা - কালা দগানত্।
পোজ্জেন্ আঘে, টানাত্ নেই,
বেবে ব়েনান্ উদোনত্।

ভাত্ - তোন্ মজা উব্ নেই,
ব়োনোই যিয়েগোই বাজারত্।
বাজার’ ফিয়ে টাঙেয়্যা রুয়ে,
দোগোনো বাজ’ ইজরত্।

বেন্ মুজুঙোত্ বেবে আঘে,
বাজার’ পধতান্ চেই।
ব়োনোই আধত্ সিদোলো পঙাঁ,
এক নাল্ সুধোও নেই।

হন্যাঁ হাম্মো?

হন্যাঁ হাম্মো? সনার চিজি!

ইক্কুলোত্ যায় আঝি আঝি!

হন্যাঁ হাম্মো তাত্তুন্ বেশ?

য়েবেলা-ওবোলা বোইবো শেঝ!

হন্যাঁ আলজি? বেলেইবুঅ।

উন্দুরে গত্তন্ হলঅ লবঅ!

উবোম্ গুরি ঘুম্ যায়।

তাত্তুন্ হাদে সোদ্যে তোগায়!

সনার চিজি ইক্কুলোত্ যার

চুলোন্ কাবি জুরগি সাজ্,

মাধাত্ গুলি তেল্।

দচ্ বাবুয়ে এক্ বাবু,

চিজি ইক্কুলোত্ গেল্।

ঠেঙত্ পিনি বোজ্জদা,

আধত্ পিনি ঘুড়ি।

টনঙ্ টনঙ্ ইক্কুলোর যার,

মাদিত্ ন' বাজের মুড়ি।

আমা চিজি ওমা ওক্
চিগোন্ চিজি চিগোন্ নয়,
যুনি একদিন ডাঙর অয়...
চক্রবত্তি রাজা অব' পিখীমিত্।
বেক্কুন্ এগত্তর গুরিবো এক্ সাজিত্।

গোদা পিখীমিয়েন্ করত্ তল্,
অহবাক্ বেক্কুনে বলত্ তল্।
হুজোত্ ফুদিবাক্ পদ্দফুল্!
উদ্ধার গুরিবো জেদিহল্।

আধত্ তুলিবো ন্যেয় বিচার।
চাহদে সোনা মূ হোচপেবার!
উত্তরে আগাজ্, তলে দজ্যে,
সেত্তমান্ অবো চিজির ধোয্য।

তমা মূয়োত্ ফুল্ পড়োক্।
আমা চিজি ওমা ওক্!!!

বান্দর' ধান্ তলোই
বেবে মরেল্লোই পেক্ রাঘাত্,
চিজি গা ধুজ্জৈ গান্।
বেলান্ ডুবেল্লোই আঝি আঝি,
বান্দরে গুগাদন্ ধান্।

নানু ডাগের ওয়াঙ্ ওয়াঙ্,
নাগর চিজি হোই?
রিনি চেলৈ ঝাদি আয়,
বান্দর' ধান্ তলোই।

নানু দেঘে দেয় গাজ' মাধাত্,
চিজি চাইদি মেঘকানি!
বাচ্ছে থাক্, উত্তরে দোঙগি,
চোঘো ভাঙানি বেক্কানি!

যে চাঙমা সে চাঙমা
মাঞেঁ হধা দুরোত্ থং,
মরে মুই পুজোর লং।
ও মুই হন্যা? মুই হন্যা?
কিয়ে হন্ নৃগোষ্ঠী,
কিয়ে হন্ উবোজাত্।
হিচ্ছু মুই ন' বুজং...
মুই যে চাঙমা, সে চাঙমা!

দুখকাম্ ত' গুরি,
দিম্মো ন'অলে ছ'হুড়ি।
ঘি দিনেই টানি চাং,
নাক্য অয়নি লাম্বা।
আ হোই...
যে নাক্ সে নাক্,
চেবেদাক্ চেবেদাক্!
যে চাঙমা সে চাঙমা!

আস্কার ঘরত্ অবং পহর
সমাজ্যে-সমারি একুই মন,
উচ্ছো ফুচ্ছোই ইক্কুল্ সং।
আমা ইক্কুল্ আমা ঘর,
আস্কার ঘরত্ অবং পহর।
এগোবো অবং ফুলোসান,
নিঘিলিবো ফুলোর তুমবাচ্ছান্।
ছিদি পুড়িবোং পিখীমিত্,
নাঙ্ রাগেবং গম্ কিত্তিত্।
আমি জাদর, আমি বেগর,
আধ্ তুলিনে দির হবর।
লেঘা শিঘি কাত্ অবং,
দেজ্-জাদর মান্ রাগেবং।

...বজোস্!

... ইঁ!

রাজার আগন্ য়েদ্-ঘড়া।

সোনা-রুবো দুল্ ভরা!

দুধোলী গরু ন' হরন্।

হে পারিবে চিক্কো, পেঠ্ ভরন্।

বজোস্!

... ইঁ!

যুনি রাজায় গরে ভাগে ভাগ্।

রাজায় তিম্মো পুওয় ন' পেবাক্।

চেই থাক্, চিক্কো তুই চেই থাক্।

তরে হামাক্কায় দিব' ডাঙঁর ভাগ্।

সনার চিজি চুন্ধি থাক্।

বজোস্!

... ইঁ!

রাজার ঘরত্ রাজার ঝি।

পরী মিলে সান্ গুরি।

আমিজে বেরেই থান্ লগে সমারী।

রাজার ঝিবো সেম্বা দোল্।

চিক্কো তুই দেলে, অবে ওল্।

বজোস্!

... ইঁ!

কানিলে মুত্তো ঝড়ন্।

আঝিলে মানিক্ পড়ন্।

আখিলে হুজোত্ ফুল্ ফুদন্।

রাজার ঝিবো এব' পালকিত্ গুরি।

চিজিরে নেজেব' করত্ গুরি।

রাজায় তা ঝিবো বো দিব'।

সনার চিজি এবার ঘুম্ য়েব'।

ঘুম্ এজের চিক্কো?

... ইঁই... (ঘুম য়ার...)

চিত্ পাগল্ ডাঙঁৰ ভুজি

চিত্ পাগল্ ডাঙঁৰ ভুজি,
তোনোত্ ন'দে সাবाराং-ফুজিঁ।
হদক্ হে পারে ঘুজি ঘুজি।
বেগুন্ তোন্, আমিলা বুল্,
বাচ্ছুরি গদেয়ে, ওলোদো ফুল্।

পুল্যাঙ' তলাত্ সুজমুরিচ্,
বেৰ' মাধাত্ তেল্।
ভাত্-তোন্ পিলে উত্বেফুতো,
বিলেইবো ডিগেই গেল্।

আমা ভুজি ধহল্ করা

আমা ভুজি ধহল্ করা!
পহঁত্যা যিয়ে চোল্ কাৰা।
ডবল্লা চোলোভাত্ বরা বরা,
চিজিক্কো তোগায় মুঠ্ জরা।

ডিঙিঁ কিলেত্ ভারভারি নেই,
সোর গুরিবেক্ কমলে!
এক্ ভুক্ দ্বি ভুক্ দি ন' পারে,
চোলুন্ পরন্দোই ওয়ালে!


বান্দরে ঝাড়দন্ ঘুচে তায়

বান্দরে ঝাড়দন্ ঘুচে তায়,
ঘুতে মাধাত্ বোই।
দাধাহ্ খেলেল্লোই ছিলে খারা,
দিবের হবর নেই চৈ।

মামাহ্ কা দের চিগোন্ সুধো,
চোরগি কলান্দোই।
বেবে তুলের খাদিত্ ফুল,
আলাম' ফুলুন্দোই।

বাবাহ্ গরের পেবের পেবের,
বেক্কুনে থবাহ্ থবাহ্!
বিব্বু এজের, বাচ্ছে থাগ',
কনে কি লবাহ্!

থুম



এমন কেউ কি আছেন - যে ছোটবেলায়
 আমপাতা জোড়া জোড়া, হাতি মাটিম টিম
 বা ঐ দেখা যায় তালগাছ পড়েননি?
 আশাকরি নেই! কত মজা করে ছড়া কেটে
 অভিনয়ের মাধ্যমে আমাদের গেলানো হত
 তাই না? বাবা-মা সর্বদা ব্যস্ত থাকত যাতে
 আমরা মুখস্ত করতে পারি! অন্যদের
 শুনিয়ে হাততালি কুড়াতে পারি! সত্যি
 বলতে কি আজ আলোময় দার রচিত
 চাকমা ভাষায় ছড়াগুলো পড়ে মনে হচ্ছে
 আমরা ছড়ার মজাটা কখনোই পুরোপুরি
 পাইনি! ছড়া আবৃত্তির আনন্দ থেকে
 অনেকাংশেই বঞ্চিত হয়েছি! এ কথাটি
 হয়ত বাংলা ভাষাভাষী ব্যতীত অন্য সকল
 ভাষাভাষীদের জন্য সত্য! ছড়াগুলো সত্যি
 অনেক মজার! অনেক মধুর! অনেক মিষ্টি!
 বিশ্বাস হয় না? নিজ ভাষায় পড়ে দেখুন!

- বাসুদেব চাণ্ডমা

প্রচ্ছদ । পিপিলিকা
 প্রচ্ছদ ছবি । সুপংকর চাণ্ডমা